

MIMI A RETA PERSONA ROBEZ PA SU MES ERROR

Segun mi tin entendi di yamadan cu mi a ricibi ayera, Sra. Mimi Koolman na Top 95 presumiblemente a reta mi persona relaciona cu trabao di jurado di dia di calypso y roadmarch contest.

E lo a referi na deliberacionnan di juradonan despues di e contest y lo a reta mi persona pa bisa cu lo no ta asina, refiriendo aki na presunto conversacion o algo por estilo cu e lo tabata tin cu Inky Richardson encuan to kibramentonan di regla.

Mi ta ripiti, mi no a scucha e presunto reto, ta hendenan a yamami encuan to esaki, y ningun por a menciona exactamente kico ta kico tampoco.

Mi a yama Mimi pa mi sa kico e lo por a bisa y si ta algo cu e mester dimi contesta of no, y e no a yama back tampoco, te na momentonan cu mi ta skirbi e comentario aki.

TRABAO DI JURADO

Ora un persona acepta pa actua como jurado, e ta haya su mes cu stipulacionnan na cual e mester atene su mes na dje.

Den jurado tin ademas un persona cu ta e president di jurado.

Si bo tin cualquier problema cu bo a confronta cune basa riba stipulacionnan of bo tarea, bo ta comunica cu bo president di jurado.

Si despues di e votacionnan a drenta momentonan di deliberacion, y bo tin remarca di haci bo ta haci esey. E decision cu wordo tuma e ora ey ta keda pa responsabilidad di e president di jurado y e organizadornan di e evento.

Bo a haci bo trabao, bo a cumpli, bo a haci bo remarca, decision a cay, y bo tarea a termina como jurado.

Si e decision pa casualidad no ta na bo agrado, no ta bo tarea di trece esey den publicidad. (mi no ta bisa aki cu Mimi lo a haci esey). Si tin algo di splica, esey ta e president di jurado of e organizadornan cu mester haci esaki.

E error di Mimi aki ta di bay retami pa bay papia cos cu eticamente no ta mi responsabilidad, ni di dje, ni di otro miembronan di jurado.

Locual si mi ta para ariba pa kita cualquier duda cu lo por ta existi, **NINGUN IRREGULARIDAD A TUMA LUGAR E ANOCHI DI CALYPSO ROADMARCH.**

E miembronan di jurado a cumpli cu nan tarea manera stipulacionnan tabata. Comentarionan riba e trabao a wordo duna na president di jurado y na president di **ASOMA** e anochi aki, y no ta cos cu ningun miembro di jurado ni di e anochi aki, ni den otro actividadnan tin derecho di saca for di porta di sala di deliberacion, cosnan cu a ser papia den e reunion di deliberacion.

RECLAMA MES ORA Y KEDA PARA Ariba

Ora bo ta jurado y bo no ta di acuerdo cu algo, y si decision cay y bo no ta di acuerdo cune, bo ta protesta eynan, y si bo kier trece den publicidad bo ta pone tur hende na altura di bo malcontento y kico bo ta bay haci.

No warda te tanto dia despues pa trece e asunto aki den publicidad.

Si bo tabata den jurado y bo ta traha cu un medio di comunicacion, manera mi persona -- y tambe Mimi Koolman cu tabata jurado e anochi ey--mescos cu bo ta usa bo etica di trabao, bo ta usa bo etica como miembro di jurado.

Si e topico pa un of otro motibo a bin dilanti, bo no ta use na radio como miembro di jurado-periodista, bo ta referi "e reclamante" na president

di jurado y e organizador.

Si ta trece mes bo kier trece dilanti na radio of corant, bo ta aserca e president di jurado of e organizador, y laga nan contesta e pregunta cu bo kier haci, pero no forza e topico pasobra bo kier impresiona un of otro persona, grupo di persona, y busca popularidad. Bo no ta forza tampoco ningun hende, ni otro miembronan di jurado den e asunto cu ta di bo y no di nan, **NI RETA NAN TAMPOCO.**

Ta bo credibilidad como jurado y como periodista bo ta hungando cune.

Ta bo imagen como comunicador ta den wega.

Aki atrobe mi ta menciona cu mi no ta bisa cu ta asina cos a bay cu Mimi. Ta splica mi kier splica cu bo tin etica pa tene cuenta cune den asuntunan asina.

Pa Mimi su informacion, mi a papia ayera tambe cu un persona cu tin un relacion cu un di e gruponan musical cu a hacimi diferente pregunta riba locual lo a bin dilanti den Mimi su programa ayera, y mayoria di locual mi ta splica aki riba, mi a splike tambe.

No ta mi tarea di divulga nada di votacion, ni di duna informacion encuan to e trabao di jurado, ni di splica si tabata tin of no tabata tin irregularidad, locual mi a desmenti.

E persona tabata bon informa di stipulacionnan di jurado y a menciona hasta cosnan di e deliberacionnan, y cu mi el a keda mes leeuw pasobra mi a referi e persona na president di jurado of organizadornan. Mimi su error ta di a reta e persona robez **PA PAPIA E VERDAD.** Sorry Mimi, **MI NO TA ACEPTA BO RETO** y bo por calificami na radio numa como un cobarde si bo kier. Esey lo no duel mi.

POCO MAS RIBA ASUNTO DI ETICA

Si bo ta den un organizacion of comision, nada cu ta ser papia **INTERNAMENTE** bo no ta trece pafo di e portanan di sala di reunion.

Si bo ta contra algo, ta den e reunion bo ta trece esaki.

Si bo a gana of perde bo argumento, eticamente bo no ta sali y propaganda esaki y tira culpa.

Bo no ta saca paña sushi di e reunion tira riba caya.

Ni si bo ta periodista, bo no ta sali bay bo medio tampoco y divulga cosnan **INTERNO** di e organizacion. Ni como miembro, ni como invitado di e organizacion.

Como periodista den hopi caso hende tin miedo di papia cu bo riba cierto asunto, of papia den bo cercania.

Si bo ta un persona conoci pa mantencion di etica y cu credibilidad periodistico, nan no tin ningun temor di sconde loke nan kier bisa pasobra bo tey.

Si bo ta conversa privadamente cu hende y nan contabo cierto cosnan, bo ta tene esaki pa bo.

Si bo ta mira noticia den dje y bo kier divulga e noticia, bo ta pidi e persona su permiso y si e nengabo, bo ta tene bo mes na esey.

Si bo ta conversa cu un ministro y el a divulga den e conversacion priva algo irregular den gobierno of den su cartera of cartera di otro, ta algo priva esey ta y no ta cos di core bay divulga sin cu bo tin permiso di dje.

E no a confiabo como periodista, el a confiabo como un persona priva cu lo mantene loke a bin dilanti entre boso dos.

E dia cu bo faya den esaki, y cu e sali den publicidad y bira topico di conversacion, bo credibilidad y imagen a dal abao tambe eynan, y ningun hende lo confiabo mas tampoco.

Juby